



Hōtaka 5 – ahunga ki...

Kia mahara tātou ki ngā momo kupu e rua hei waihanga rerenga kōrero. Ko ngā **kupu matua** ka kawe i te matū – arā, ko ngā **‘tū’** ērā; ka tāpirihia ngā **kupu hāpai** e pūrangiaho ai ngā whakaaro, e kīia nei, ko ngā **‘pū’**.

Mō te hunga kua āhua roa e ako ana i te reo, ko ngā pū ngā kupu whakarangirua, whakapōrearea rānei i te maringi o te kupu i te waha.

Kia tirohia e tātou ētehi tūmahi me ngā kupu hāpai ka whai atu. Ka noho te pū **‘ki’** ki muri i ētehi tūmahi hei tohu i te ahunga atu **ki** tētehi mea.

- a) Haere koe i tō haere.
- e) **Haere** koe **ki** tō rūma.

- a) Me waiata i te waiata.
- e) Me **waiata ki** te rōpū.

- a) Me pānui i te pukapuka.
- e) Me **pānui ki** te katoa.

- a) Me kōrero i te pakiwaitara.
- e) Me **kōrero ki** ngā tamariki.

I roto i ngā tauira (e) o runga ake nei, ko te pū **‘ki’** ka whai i ngā tūmahi ‘haere’, ‘waiata’, ‘pānui’, ‘kōrero’ hei tohu atu i te ahunga atu o taua mahi ki tana aronga. Ka kite koe ka whaiwāhi atu anō hoki te pū **‘i’** ki muri i aua tūmahi engari he rerekē rawa atu te tikanga o tētehi i tētehi.

Hei mahi:

Tuhia kia 5 ngā **tūmahi** rerekē hei whakauru atu ki roto i te rerenga kōrero kei raro iho nei.

I

atu mātou **ki** tērā taha o te awa.

Whakautu: haere, hīkoi, kauhoe, whakawhiti, rere, tārerere, oma, karanga, tere, titiro, hoki, aurak, hoe...